

MESYUARAT KETIGA, PENGGAJ KETIGA
PARLIMEN KEEMPAT BELAS
2020

HARI SELASA : 17 NOVEMBER 2020

JAWAPAN-JAWAPAN BAGI PERTANYAAN-PERTANYAAN JAWAB
LISAN YANG TIDAK DIJAWAB DI DALAM DEWAN
(SOALAN NO. 10 HINGGA NO. 40)

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : DATO' ABDULLAH SANI
BIN ABDUL HAMID [KAPAR]**

TARIKH : 17 NOVEMBER 2020 (SELASA)

SOALAN

Minta **MENTERI BELIA DAN SUKAN** menyatakan apakah terdapat sebarang program khas atau latihan khusus bagi belia dalam menjana pendapatan ketika menghadapi kesan pandemik COVID-19.

JAWAPAN

Tuan Yang di-Pertua,

1. Untuk membantu golongan belia menghadapi cabaran sewaktu dan pasca pandemik COVID-19, Kementerian telah melaksanakan pelbagai **Kolaborasi Rentas Kementerian** seperti berikut:

- (i) **Program myGIG** bertujuan meningkatkan keterlibatan belia dalam ekonomi gig bagi menjana pendapatan sama ada secara sambilan atau kekal; sekali gus membantu belia yang terkesan melalui dua platform:
 - a) **myGIG Servis** – yang menggunakan platform yang dibina oleh MDEC iaitu eRezeki – memberikan akses kepada platform-platform perkhidmatan dalam talian seperti *FoodPanda*, *Grab* dan *Lalamove*.

- b) **myGIG Digital Freelance** –juga menggunakan platform GLOW oleh MDEC – menyediakan peluang untuk mendapatkan kerja-kerja yang memerlukan kepakaran khusus seperti (dengan izin) *copywriting, data entry, recruiting, content creator, web designing* dan sebagainya. Latihan kemahiran juga disediakan dan peserta boleh membida untuk mendapatkan projek di platform seperti *Upwork.com* dan *Freelancer.com* dengan bimbingan jurulatih MDEC.

Sehingga 22 Oktober 2020, seramai 1,957 belia telah mendapat manfaat pada tahun 2020 (tidak jauh daripada sasaran asal 2,000 peserta).

- (ii) **Skim Perantisan Nasional (SPN)** juga adalah tawaran baharu melalui jaminan pekerjaan melibatkan syarikat atau organisasi untuk memberi pengalaman bekerja dan melonjakkan kebolehpasaran belia pasca COVID-19.

Perantis akan ditempatkan di organisasi mengikut keperluan dan kemahiran yang diperlukan. Sepanjang **6 bulan tempoh penempatan**, perantis akan mendapat peningkatan kemahiran (*upskilling*), latihan semula (*reskilling*) dan silang kemahiran (*cross-skilling*).

Antara '*soft skills*' (dengan izin) yang diberi penekanan meningkatkan profil perantis adalah:

- (a) Kemahiran sosial (iaitu pidato dan teknik penulisan);
 - (b) Kemahiran negosiasi; serta
 - (c) Kemahiran generik (iaitu pemikiran kritis dan kemahiran menyelesaikan masalah).
- (iii) Melalui kerjasama dengan Kementerian Pertanian dan Industri Makanan (MAFI), Institusi Latihan dan Kemahiran Belia dan Sukan (ILKBS) turut melatih belia untuk menjadi **Agropreneur Muda**.

- (iv) ILKBS juga melatih usahawan muda melalui program TVETpreneur dengan kerjasama Kementerian Pengajian Tinggi (KPT) dan Kementerian Pembangunan Usahawan dan Koperasi (MEDAC); serta menawarkan sokongan modal daripada TEKUN Nasional di bawah PENJANA. Kemudahan seperti **Inkubator, Maker-Space Mybizhub@ILKBS, Program Bootcamp** dan **kursus-kursus modular** dibangunkan di beberapa ILKBS untuk mencapai objektif ini.

2. KBS juga sedang menerajui pembangunan (dengan izin) *Single Landing Page (one-stop center)* yang dinamakan Sistem MyBelia. Sistem ini menyediakan maklumat bersepadu berkaitan inisiatif-inisiatif yang telah disediakan oleh Kerajaan dan bukan Kerajaan untuk dimanfaatkan oleh belia merangkumi: peluang pekerjaan; latihan dan kemahiran; serta dana dan kemudahan yang ditawarkan.

3. Inisiatif-inisiatif seperti yang saya sebutkan akan diteruskan malah dikembangkan lagi pada tahun hadapan melalui Belanjawan 2021.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN
DARIPADA : YB TUAN AHMAD JOHNIE BIN ZAWAWI
KAWASAN : IGAN
TARIKH : 17 NOVEMBER 2020 (SELASA)

SOALAN NO. 11

minta **MENTERI KANAN KERJA RAYA** menyatakan status semasa perkembangan Projek Pan Borneo Sarawak. Apakah usaha yang telah dan akan dilakukan bagi memastikan impak penularan COVID-19 dari segi kelewatan penyiapan jajaran yang sedang dalam pembinaan dan peningkatan kos yang terlibat? Juga nyatakan jajaran-jajaran pembinaan yang terlibat.

JAWAPAN

Tuan Yang Di-Pertua,

Sebagaimana Ahli Yang Berhormat sedia maklum, projek Lebuh Raya Pan Borneo Sarawak kini sedang dilaksanakan secara konvensional dengan kerjasama JKR Sarawak susulan daripada penamatan Perjanjian Rakan Pelaksana Projek (*Project Delivery Partner Agreement* – PDPA). Sehingga bulan September 2020, status kemajuan terkini adalah 57% bagi projek Lebuh Raya Pan Borneo Sarawak dari Telok Melano ke Miri dengan jangkaan siap sepenuhnya pada tahun 2022.

Sama seperti projek-projek Kerajaan lain, wabak Covid-19 telah memberi sedikit sebanyak kesan ke atas kemajuan kerja dan kos pembinaan Projek Lebuh Raya Pan Borneo Sarawak. Walau bagaimanapun, kerja-kerja pembinaan masih boleh diteruskan tertakluk kepada kebenaran pihak berkuasa dan pematuhan kepada *Standard Operating Procedure* (SOP) yang ditetapkan.

Sehubungan itu pelbagai *mitigation plan* sedang dilaksanakan antara lainnya penyelarasan semula jadual pembinaan dan Lanjutan Masa (*Extension Of Time* - EOT) selama 84 hari bagi memastikan kelancaran dan kelangsungan projek Lebuh Raya Pan Borneo Sarawak sebagai pemangkin pembangunan sektor sosio-ekonomi, perindustrian serta pelaburan di sepanjang jajaran projek tersebut.

Sekian, terima kasih.

**PEMBERITAHUAN PERTANYAAN JAWAB LISAN
DEWAN RAKYAT MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : JAWAB LISAN

**DARIPADA : PUAN ALICE LAU KIONG YIENG
[LANANG]**

TARIKH : 17 NOVEMBER 2020 (SELASA)

SOALAN

PUAN ALICE LAU KIONG YIENG [LANANG] minta **MENTERI PEMBANGUNAN WANITA, KELUARGA DAN MASYARAKAT** menyatakan bilangan kes keganasan rumah tangga yang dilaporkan kepada hospital dan klinik kesihatan awam dari tahun 2016 hingga 2020 dan senaraikan bilangan kes mengikut negeri, hubungan antara pelaku dan mangsa, umur pelaku dan mangsa, bangsa pelaku dan mangsa, jantina (gender) pelaku dan mangsa. Apakah usaha Kementerian untuk membendung kes keganasan rumah tangga setakat ini.

JAWAPAN

Tuan Yang di-Pertua,

Kementerian Kesihatan Malaysia (KKM) mengumpul data daripada perkhidmatan *One Stop Crisis Center* (OSCC) yang beroperasi 24 jam di semua Jabatan Kecemasan hospital KKM bagi kes-kes penderaan fizikal dan seksual malahan juga penderaan psikologi bagi semua golongan terutama wanita dan kanak-kanak di Malaysia. Data pada tahun 2019 menunjukkan jumlah kes penderaan (bagi semua jenis penderaan) yang dilaporkan adalah sebanyak **10,880 kes**. Daripada jumlah ini, bagi kes yang dilaporkan ke OSCC, penderaan fizikal merupakan jenis penderaan tertinggi iaitu **7,668 kes (70.5%)**, diikuti dengan penderaan seksual **3,132 kes (28.6%)** dan penderaan psikologi **80 kes (0.9%)**.

SOALAN NO : 12

Pada tahun 2019, jumlah kes keganasan rumah tangga yang dilaporkan daripada OSCC yang tertinggi adalah W.P. Kuala Lumpur & Putrajaya (**1,296 kes**) diikuti Johor (**1,257 kes**) dan Pulau Pinang (**1,141 kes**). Mengikut status hubungan dengan pelaku bagi jenis penderaan fizikal, majoriti pelaku adalah ibu/bapa kandung bagi kanak-kanak, manakala remaja (18 tahun ke atas) dan dewasa adalah suami/isteri. Bagi penderaan seksual, majoriti pelaku adalah saudara mara bagi kanak-kanak dan remaja manakala bagi dewasa majoriti pelaku merupakan ibu/bapa kandung. Begitu juga penderaan emosi, majoriti pelaku adalah ibu/bapa kandung bagi kanak-kanak dan bagi remaja dan dewasa majoriti pelaku merupakan suami/isteri.

Bagi jenis penderaan fizikal, majoriti kes adalah golongan dewasa (20 tahun ke atas) dan merupakan jantina perempuan, bagi penderaan seksual, majoriti adalah kanak-kanak berumur 10 – 17 tahun dan majoriti jantina perempuan bagi kes rogol dan cabul, manakala kes liwat majoriti jantina lelaki. Bagi penderaan psikologi/emosi, majoriti berlaku pada kanak-kanak berumur 0-9 tahun dan jantina perempuan. Bagi ketiga-tiga jenis penderaan, majoriti mangsa adalah berbangsa Melayu.

Berdasarkan statistik Jabatan Kebajikan Masyarakat (JKM), dari tahun 2016 hingga Jun 2020, sebanyak **3,391** kes telah dilaporkan kepada JKM. Dari pada jumlah tersebut:

- 3 negeri tertinggi berlakunya kes keganasan rumah tangga ialah Selangor iaitu 718 kes (21.2%), Pulau Pinang sebanyak 519 kes (15.3%) dan Kedah sebanyak 364 (10.7%).
- 3 kategori umur tertinggi pelaku bagi tahun 2016 hingga Jun 2020 adalah 22-39 tahun sebanyak 1,851 (61.1%), 40-59 tahun sebanyak 1,006 (33.2%) dan 18-21 tahun sebanyak 95 (3.1%).
- 3 kategori tertinggi umur mangsa bagi tahun 2016 hingga Jun 2020 ialah 22-39 tahun sebanyak 2,007 (59.2%), 40-59 tahun sebanyak 691 (20.4%) dan kanak-kanak bawah 18 tahun sebanyak 371 (10.9%).

SOALAN NO : 12

- 3 kategori etnik tertinggi pelaku bagi tahun 2016 hingga Jun 2020 adalah Melayu sebanyak 1,941 (61.6%), India sebanyak 537 (17.0%) dan Cina sebanyak 342 (10.8 %).
- 3 kategori etnik tertinggi mangsa bagi tahun 2016 hingga Jun 2020 ialah Melayu sebanyak 2,041(60.2%), India sebanyak 605 (17.84%) dan Cina sebanyak 379 (11.2%).
- 3 kategori tertinggi pelaku mengikut jantina ialah suami sebanyak 2,539 (80.5%), bapa kandung sebanyak 187 (59.3%), saudara mara lain iaitu lelaki 137 (4.3%) dan perempuan sebanyak 48 (1.5%).
- 3 kategori tertinggi mangsa mengikut jantina ialah isteri sebanyak 2,679 (79%), saudara mara lain iaitu lelaki sebanyak 212 (4.6%) dan perempuan sebanyak 292 (8.6%), dan bekas isteri sebanyak 67 (1.9%)

Tuan Yang di-Pertua,

Bagi menangani isu keganasan rumah tangga, Kementerian Pembangunan Wanita, Keluarga dan Masyarakat (KPWKM) mengambil tindakan di bawah Akta Keganasan Rumah Tangga 1994 [Akta 521]. Menerusi akta ini, Kerajaan memperuntukkan perlindungan undang-undang dalam situasi keganasan rumah tangga. Tindakan segera akan dijalankan bersama agensi-agensi penguatkuasaan seperti Polis Diraja Malaysia (PDRM), mahkamah dan agensi yang berkaitan bagi memastikan segala bentuk keganasan rumah tangga dapat dibendung.

Antara perkara yang diberi tumpuan adalah penambahbaikan prosedur dan garis panduan untuk agensi-agensi kerajaan mengendalikan kes-kes keganasan rumah tangga agar ia selaras dengan peruntukan di bawah Akta Keganasan Rumah Tangga 1994. Selain itu, Kementerian juga mengambil inisiatif bagi menyediakan manual yang boleh dijadikan rujukan dan panduan dalam kalangan mangsa mengenai hak-hak mereka dan memudahkan akses kepada bantuan perlindungan yang disediakan oleh agensi Kerajaan yang berkaitan. Garis Panduan

SOALAN NO : 12

Pengendalian Kes Keganasan Rumah Tangga berserta manual rujukan tersebut dijangka siap pada tahun 2021.

Kementerian turut mengadakan kerjasama dengan badan-badan bukan kerajaan dalam membangunkan bahan promosi bagi meningkatkan kesedaran tentang isu-isu berkaitan keganasan rumah tangga dan pada masa yang sama, menekankan tentang keperluan sokongan psikologi yang berterusan kepada mangsa yang turut disediakan melalui Talian Kasih KPWK. Selain itu, Kementerian turut memfokuskan untuk memperluas tempat selamat di bawah Jabatan Kebajikan Masyarakat (JKM) dan tempat berlindung di bawah badan bukan kerajaan bagi menampung keperluan mangsa dan ahli keluarga terlibat.

Isu penyelarasan data-data berkaitan kes keganasan rumah tangga juga diberi perhatian bagi membolehkan sebarang perancangan dan juga pelaksanaan program dan aktiviti dapat dilaksanakan secara bersasar yang secara tidak langsung dapat membantu dalam menambah baik kualiti penyampaian perkhidmatan.

**PEMBERITAHUAN PERTANYAAN LISAN
DEWAN RAKYAT MESYUARAT KETIGA,
PENGKAL KETIGA, PARLIMEN KEEMPAT BELAS**

PERTANYAAN : LISAN

**DARIPADA : DR. NIK MUHAMMAD ZAWAWI BIN HAJI
SALLEH [PASIR PUTEH]**

TARIKH : 17 NOVEMBER 2020 (SELASA)

SOALAN

Minta **MENTERI PEMBANGUNAN USAHAWAN DAN KOPERASI** menyatakan sejauh manakah usaha dilakukan oleh pihak Kementerian bagi memastikan di Malaysia menyedari dan memahami bahawa geran digitalisasi yang ditawarkan pihak Kementerian mampu meningkatkan keuntungan mereka.

JAWAPAN

Tuan Yang di-Pertua,

1. Penerapan digitalisasi dalam kalangan usahawan merupakan antara agenda utama Kementerian ini selaras dengan inisiatif yang digariskan di bawah Teras Strategik 5, Dasar Keusahawanan Nasional 2030 (DKN 2030) iaitu melalui program latihan dan pembangunan Industri 4.0 dan e-dagang.
2. Di bawah Pelan Jana Semula Ekonomi Negara (PENJANA) yang diumumkan pada 5 Jun 2020 yang lalu, Kerajaan telah memperuntukkan geran atau pinjaman kepada pengusaha yang layak untuk mengamal atau melanggan perkhidmatan digitalisasi melalui program Geran Automasi Pintar, Geran Padanan Pendigitalan Perusahaan Kecil dan Sederhana (PKS) dan *SME Technology Transformation Fund*.
3. Geran Automasi Pintar diterajui oleh Perbadanan Ekonomi Digital Malaysia (MDEC) di bawah Kementerian Komunikasi dan Multimedia

(KKMM), manakala Geran Padanan Pendigitalan PKS diterajui oleh Bank Simpanan Nasional, Kementerian Kewangan Malaysia.

4. Kementerian Pembangunan Usahawan dan Koperasi (MEDAC) melalui SME Bank menawarkan skim pinjaman SME *Technology Transformation Fund* (STTF). Sehingga 23 Oktober 2020, sejumlah RM24.9 juta telah diluluskan kepada 12 PKS.

5. Untuk meningkatkan lagi kesedaran dan pemahaman usahawan tempatan ke atas kepentingan digitalisasi yang bukan sahaja mampu meningkatkan keuntungan malah akan menyumbang kepada pertumbuhan dan kelestarian perniagaan mereka, pelbagai usaha telah dilaksanakan oleh MEDAC antara bulan Mac hingga November 2020 melalui pelbagai medium seperti berikut:

- (a) **wawancara dalam rancangan televisyen dan radio.** Sepanjang tahun ini sebanyak 27 slot temuramah dan wawancara berkaitan digitalisasi telah dilaksanakan;
- (b) **liputan berita di surat khabar dan portal berita.** Sebanyak 35 artikel dalam pelbagai surat khabar dan berita telah diterbitkan;
- (c) **sesi libat urus bersama usahawan dan persatuan-persatuan perniagaan dengan kerjasama kerajaan negeri.** Sebanyak 3 sesi libat urus telah dilaksanakan oleh Kementerian yang melibatkan lebih 5,000 usahawan di peringkat negeri Sabah, Sarawak dan Pulau Pinang yang antara lain bertujuan untuk mewar-warkan inisiatif digitalisasi yang sedang dilaksanakan oleh Kementerian dan pihak Kerajaan.
- (d) **siri-siri forum atas talian dan webinar di media sosial** seperti *Facebook Live*. Sebanyak 2 sesi ceramah dan 12 sesi webinar dilaksanakan di portal atas talian dan media sosial dalam usaha mempromosikan digitalisasi kepada usahawan;

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : YB TUAN NOOR AMIN BIN AHMAD [KANGAR]

TARIKH : 17 NOVEMBER 2020 (SELASA)

SOALAN

TUAN NOOR AMIN BIN AHMAD [KANGAR] minta **PERDANA MENTERI** menyatakan berapa jumlah perbelanjaan sebenar Suruhanjaya Pilihan Raya (SPR) bagi mengadakan pilihan raya negeri Sabah semasa pandemik COVID- 19.

JAWAPAN

**YB DATO' TAKIYUDDIN BIN HASSAN,
MENTERI DI JABATAN PERDANA MENTERI (PARLIMEN DAN
UNDANG-UNDANG)**

Tuan Yang di-Pertua,

Untuk makluman Ahli Yang Berhormat, jumlah keseluruhan perbelanjaan SPR dalam melaksanakan PRU DUN Sabah ke-16 adalah sebanyak **RM130 juta** yang merangkumi perolehan pembelian dan sewaan peralatan pilihan raya, keperluan peralatan dan sistem ICT, logistik, elaun petugas pilihan raya dan keperluan-keperluan lain yang berkaitan. Perbelanjaan ini turut mengambil kira keperluan peralatan mengikut garis panduan pencegahan COVID-19.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : TUAN ABDUL LATIFF BIN ABDUL
RAHMAN [KUALA KRAI]**

TARIKH : 17 NOVEMBER 2020 (SELASA)

SOALAN

TUAN ABDUL LATIFF BIN ABDUL RAHMAN [KUALA KRAI] minta **PERDANA MENTERI** menyatakan kedudukan terkini rizab dan aliran tunai Lembaga Tabung Haji dan nyatakan berapa jumlah jemaah haji yang bakal mengerjakan haji pada tahun 2021.

JAWAPAN

**YB SENATOR DATUK DR. HAJI ZULKIFLI MOHAMAD AL-BAKRI,
MENTERI DI JABATAN PERDANA MENTERI (HAL EHWAL AGAMA)**

Bahagian A : Kedudukan terkini rizab dan aliran tunai *TH*

Tuan Yang Di-Pertua,

1. Untuk makluman Ahli Yang Berhormat, secara keseluruhannya, Lembaga Tabung Haji (*TH*) mencatatkan jumlah lebihan dana atau jumlah rizab sebanyak RM1.8 bilion pada 30 Jun 2020. Kedudukan tunai *TH* juga kekal kukuh pada paras RM11.7 billion pada 30 Jun 2020.

Bahagian B : Jumlah jemaah haji yang bakal mengerjakan haji pada tahun 2021.

Tuan Yang Di-Pertua,

2. Sepertimana Ahli Yang Berhormat sedia maklum, penularan wabak Covid-19 telah menimbulkan risiko keselamatan dan kesihatan awam yang serius di seluruh dunia. Wabak ini telah menjangkiti hampir 42 juta orang dan mengakibatkan 1.1 juta nyawa telah terkorban di seluruh dunia.

3. Kerajaan Arab Saudi sentiasa menitikberatkan hal-ehwal kesihatan, keselamatan dan kesejahteraan jemaah umrah dan haji. Berikutan pandemik Covid-19 mereka telah menutup buat sementara urusan umrah sejak bulan Mac 2020.

4. Kerajaan Arab Saudi juga telah menghadkan urusan haji musim 1441H/2020M kepada mereka yang sudah pun berada dalam negara Arab Saudi pada jumlah 1,000 jemaah sahaja.

5. Kerajaan Arab Saudi memantau rapat perkembangan semasa pandemik Covid-19 serata dunia dan mereka amat berhati-hati sebelum mengeluarkan sebarang pemakluman atau kenyataan rasmi mengenai pelaksanaan umrah dan haji khasnya bagi jemaah dari luar negara.

6. Sepertimana yang dimaklumkan oleh YB Menteri Luar, YB Datuk Seri Hishammuddin Tun Hussein pada 19 Oktober 2020, Malaysia dan Arab Saudi telah bersetuju membentuk Jawatankuasa Strategik Peringkat Tinggi bagi meningkatkan kerjasama antara kedua negara. Jawatankuasa yang akan dipengerusikan bersama oleh beliau dan Menteri Luar Arab Saudi, Putera Faisal Farhan Al-Saud, akan turut membincangkan hal-hwal berkaitan umrah dan haji.
7. Sehingga kini, Kerajaan Arab Saudi masih belum mengeluarkan sebarang pemakluman atau kenyataan rasmi berhubung pelaksanaan haji bagi Musim 1442M/2021M.
8. Pihak Kerajaan Malaysia menerusi Lembaga Tabung Haji (**TH**) akan memaklumkan sebarang keputusan atau ketetapan Kerajaan Arab Saudi kepada semua pihak, setelah memperolehinya kelak.
9. Semua bakal haji dan umat Islam dipohon untuk bersabar serta menerima sebarang keputusan kelak dengan penuh reda dan teruskan berdoa agar keadaan kembali pulih bagi membolehkan urusan haji diteruskan untuk musim 1442H/2021M dan di masa-masa hadapan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN
DARIPADA : YB TUAN TEH KOK LIM
KAWASAN : TAIPING
TARIKH : 17 NOVEMBER 2020 (SELASA)

SOALAN NO. 16

minta **MENTERI KANAN KERJA RAYA** menyatakan apakah tindakan yang akan diambil dalam usaha memastikan kerja-kerja projek Kerajaan baru dipantau dengan ketat dan sempurna demi kepentingan semua rakyat dan nyatakan tindakan-tindakan yang telah diambil demi mencapai matlamat tersebut.

JAWAPAN

Tuan Yang Di-Pertua,

Untuk makluman Ahli Yang Berhormat, pihak Kerajaan telah melakukan pemantauan pada semua peringkat pelaksanaan projek bagi memastikan projek-projek Kerajaan berjalan dengan lancar serta sempurna mengikut perancangan yang telah ditetapkan. Pemantauan ini dilaksanakan di pelbagai peringkat yang melibatkan pihak Kementerian, agensi pusat dan juga agensi pelaksana. Bagi pemantauan projek di peringkat pengurusan tertinggi Kementerian dan negeri ianya dipantau melalui Mesyuarat Majlis Tindakan Pembangunan Kementerian dan Majlis Tindakan Pembangunan Negeri yang diadakan secara berkala. Selain itu, bagi projek-projek yang mempunyai permasalahan semasa pelaksanaan akan dipantau dan dibincangkan menerusi Mesyuarat Pemantauan Projek Sakit pada peringkat Kementerian dan agensi pusat.

Manakala bagi pemantauan pada peringkat agensi pelaksana dilakukan melalui pematuhan garis panduan pelaksanaan projek yang telah ditetapkan seperti perlu mematuhi tatacara kerja yang digariskan menerusi Sistem Pengurusan Bersepadu JKR Sistem Pengurusan Kualiti (SPK) MS 9001, Pengurusan Alam Sekitar (EMS) MA 14001 dan Keselamatan dan Kesihatan Pekerjaan OHSAS 18001. Di samping itu juga, pemantauan status pelaksanaan projek juga dilakukan melalui beberapa saluran perbincangan seperti Mesyuarat Sektor, Mesyuarat *Problem Solving Governance* (PSG), Mesyuarat *Contract Coordination Panel* (CCP) dan Mesyuarat Tapak. Mesyuarat-mesyuarat ini diadakan secara berkala bagi melaporkan status kemajuan projek serta membincangkan isu-isu yang berbangkit semasa pelaksanaan projek.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : YB DATO' SRI HASAN BIN ARIFIN
[ROMPIN]**

TARIKH : 17 NOVEMBER 2020 (SELASA)

SOALAN

Minta **PERDANA MENTERI** menyatakan apakah strategi yang telah diambil oleh Kementerian untuk memperkukuhkan kerjasama antarabangsa bagi melindungi ruang siber negara memandangkan terdapat beberapa laporan bahawa terdapat cubaan serangan kepada beberapa ruang siber agensi Kerajaan.

JAWAPAN

**YB DATUK SERI MOHD REDZUAN BIN MD. YUSOF,
MENTERI DI JABATAN PERDANA MENTERI (TUGAS-TUGAS KHAS)**

Tuan Yang di-Pertua,

1. Kerajaan Malaysia telah dan sedang melaksanakan pelbagai inisiatif dalam strategi kerjasama antarabangsa untuk menangani isu keselamatan siber melibatkan kerjasama diplomatik dan polisi, penguatkuasaan dan kerjasama teknikal. Di peringkat ASEAN, Malaysia amat aktif melaksanakan inisiatif kerjasama di ketiga-tiga platform ASEAN iaitu komuniti politik dan keselamatan, komuniti ekonomi dan komuniti sosio-budaya yang masing-masing mempunyai pelbagai inisiatif keselamatan siber.

2. Untuk makluman Ahli Yang Berhormat, Malaysia menerajui pembentukan *ASEAN Cybersecurity Coordinating Committee* (ASEAN Cyber-CC), iaitu satu platform yang menyelaras semua aktiviti dan inisiatif

berkaitan keselamatan siber merentasi ketiga-tiga tonggak Komuniti ASEAN. Malaysia juga merupakan antara negara yang aktif dalam mengetengahkan idea dan pandangan serta menjadi pencetus kepada pembangunan platform khusus bagi membincangkan isu keselamatan siber.

3. Antaranya termasuklah pembangunan *ASEAN Regional Forum (ARF) Work Plan on Security of and in The Use of ICTs* dan pembangunan platform khusus bagi membincangkan isu berhubung keselamatan siber dalam ARF iaitu *ARF Inter-Sessional Meeting on Security of and in The Use of ICTs*. Penubuhan platform ini turut membawa kepada inisiatif-inisiatif pembangunan keyakinan, khusus dalam bidang keselamatan siber seperti *ARF Cyber Point of Contacts (PoC)*, perbincangan berhubung norma-norma siber serta pelaksanaan seminar, bengkel dan latihan dalam bidang keselamatan siber.

4. Dari aspek jenayah siber, agensi penguatkuasa turut melaksanakan kerjasama dalam perkongsian maklumat untuk mempercepatkan proses siasatan. Malaysia juga telah menandatangani Memorandum Persefahaman (MoU) bersama negara Amerika Syarikat, Australia, United Kingdom dan Vietman serta Perjanjian bersama negara Arab Saudi dan China berhubung kerjasama dalam menangani jenayah rentas sempadan termasuk jenayah siber.

5. Selain itu, Malaysia melalui *National Cyber Coordination and Command Centre (NC4)* turut berkerjasama dengan negara-negara serantau dalam menangani insiden serangan siber. Malaysia juga sentiasa memastikan elemen pembangunan keupayaan dan kepakaran di masukkan dalam semua kerjasama yang terlibat oleh Malaysia sama ada di peringkat serantau atau antarabangsa. Malaysia juga merupakan negara anggota *Global Forum of Cyber Expertise (GFCE)*, forum global yang dianggotai oleh pelbagai pemegang taruh (stakeholders) kepada persekitaran siber iaitu negara-negara, organisasi-organisasi antarabangsa dan syarikat-syarikat swasta untuk bertukar-tukar pengetahuan dan berbincang mengenai amalan terbaik serta berkongsi kepakaran dalam bidang keselamatan siber dalam memperkukuhkan pembangunan kapasiti dalam bidang keselamatan siber di peringkat global.

6. Di samping itu, Malaysia juga merupakan negara yang aktif dan telah 2 kali dilantik oleh pihak Pertubuhan Bangsa-Bangsa Bersatu (PBB) sebagai salah sebuah negara bagi menganggotai kumpulan pakar dalam *United Nations Group of Governmental Experts (UNGGE) on Developments in Information and Telecommunications in the Context of International Security*. Kumpulan ini membincangkan isu-isu keselamatan siber dengan melihat kepada dasar dunia dalam perkara-perkara berkaitan perundangan, teknikal, kerjasama antarabangsa, inisiatif, tindakan pembinaan keyakinan seterusnya mencadangkan halatuju UN dalam menangani isu keselamatan siber secara berkesan di peringkat global.

7. Pada masa yang sama, Malaysia juga turut aktif menyuarakan pendirian dalam *United Nations Open-Ended Working Group on Developments in the Field of Information and Telecommunications in the Context of International Security (OEWG)*, sebuah platform membincangkan elemen yang hampir sama dengan UNGGE tetapi lebih inklusif melibatkan semua negara anggota PBB.

8. Pada 12 Oktober 2020 yang lepas, Strategi Keselamatan Siber Negara (Malaysia Cyber Security Strategy (MCSS) telah dilancarkan dimana kerajaan memperuntukkan RM1.8 billion untuk melaksanakan inisiatif-inisiatif keselamatan bagi tempoh 2020 sehingga 2024. Strategi ini memperincikan program-program kerjasama bilateral dan multilateral secara lebih bersepadu dengan mengambil kira penglibatan semua pihak termasuk kerajaan, swasta, industri dan ahli akademik.

Sekian, terima kasih.

**PEMBERITAHUAN PERTANYAAN JAWAB LISAN
DEWAN RAKYAT MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN STEVEN CHOONG SHIAU YOON
[TEBRAU]**

TARIKH : 17 NOVEMBER 2020 (SELASA)

SOALAN

TUAN STEVEN CHOONG SHIAU YOON [TEBRAU] minta **MENTERI PERUSAHAAN PERLADANGAN DAN KOMODITI** menyatakan apakah langkah-langkah pembaharuan daripada segi inovasi dalam menghadapi cabaran larangan EU dan AS terhadap minyak kelapa sawit.

JAWAPAN

Tuan Yang Di-Pertua,

Pada masa ini, Kementerian Perusahaan Perladangan dan Komoditi bersama agensi di bawahnya iaitu Lembaga Minyak Sawit Malaysia (MPOB), Majlis Minyak Sawit Malaysia (MPOC) dan Majlis Pensijilan Minyak Sawit Malaysia (MPOCC) sedang giat memastikan industri sawit negara sebagai industri yang mampan selaras dengan hala tuju dan kerangka *Sustainable Development Goals* (SDG) Persatuan Bangsa-Bangsa Bersatu (PBB) untuk mematuhi permintaan global termasuklah Kesatuan Eropah (*European Union* – EU) dan Amerika Syarikat (AS).

Seperti mana Ahli Yang Berhormat sedia maklum, pihak perundangan EU telah menghadkan penggunaan minyak sawit sebagai bahan mentah biobahan api menjelang 2023. Bagi memperlihatkan kesungguhan Malaysia ke arah kemampanan pengeluaran sawit, Kementerian saya telah melaksanakan Skim Pensijilan Minyak Sawit Mampan Malaysia (MSPO) secara mandatori sejak 1 Januari 2020 yang lalu. Pelaksanaan ini dibuat di sepanjang rangkaian pengeluaran minyak

SOALAN NO : 18

sawit dengan memastikan segala amalan pertanian baik (GAP), peraturan dan perundangan serta kepentingan kepada alam sekitar dipatuhi.

Sehingga 13 November 2020, pencapaian pensijilan MSPO dilihat baik iaitu 88.04% atau 5.2 juta hektar daripada 5.9 juta hektar kawasan tanaman sawit yang berlesen telah dipersijilkan dengan MSPO. Manakala 94.25% atau 426 daripada 452 kilang sawit pula telah dipersijilkan dengan MSPO. Pensijilan MSPO ini kini dalam proses penilaian semula bagi memperkukuhkan lagi pensijilan tersebut. Pada masa yang sama, usaha juga sedang giat dilaksanakan bagi penerimaan dan pengiktirafan MSPO di peringkat global terutamanya di pasaran Eropah. Selain itu, program promosi MSPO juga turut giat diadakan di Amerika Syarikat.

Dalam memperkasakan lagi aktiviti penanaman sawit khususnya ke arah kemampanan industri, Kementerian telah memperkenalkan beberapa polisi baharu iaitu:

- (i) mengehadkan keluasan penanaman kelapa sawit seluruh negara dengan penetapan sasaran seluas 6.5 juta hektar sahaja;
- (ii) melaksanakan larangan penanaman baharu sawit di atas kawasan baharu tanah gambut dan penetapan syarat serta peraturan yang lebih ketat terhadap tanaman sawit di kawasan tanah gambut sedia ada;
- (iii) melaksanakan larangan penukaran guna tanah Hutan Simpan Kekal (HSK) bagi aktiviti penanaman sawit atau tanaman pertanian lain; dan
- (iv) penyediaan peta rasmi bagi kawasan sawit di seluruh negara untuk capaian umum.

Pelaksanaan kepada polisi ini adalah penting bagi meyakinkan pihak luar terhadap ketelusan negara dalam menguruskan aktiviti penanaman sawit dengan mampan tanpa mengabaikan kepentingan alam sekitar dan pada masa yang sama sebagai salah satu usaha bagi menangkis segala dakwaan yang tidak tepat daripada pihak luar terutamanya EU terhadap industri sawit negara.

SOALAN NO : 18

Selain itu industri sawit negara kini memberi perhatian dan fokus dalam meningkatkan produktiviti pengeluaran hasil sawit melalui sumber sedia ada yang terhad dan secara tindak langsung mengelakkan risiko peluasan kawasan sawit di kawasan yang sensitif seperti hutan dan tanah gambut. Antara langkah dalam meningkatkan produktiviti ini termasuklah:

- (i) penggunaan teknologi genom bagi penghasilan benih yang lebih berkualiti;
- (ii) mekanisasi ladang dan penggunaan jentera yang lebih efektif dalam proses tuaian; dan
- (iii) pembangunan formulasi dan penggunaan baja yang cekap nutrien serta kawalan penyakit dan perosak yang berkesan.

Untuk makluman, Kementerian saya juga melalui MPOB sentiasa menjalankan penyelidikan dan pembangunan produk-produk baharu tambah nilai berasaskan sawit terutamanya untuk sektor hiliran seperti fitonutrien dan oleokimia. Oleh itu, strategi pemasaran produk sawit Malaysia sentiasa dinamik bergantung kepada perubahan semasa dan industri sawit negara sentiasa sedia untuk mengadaptasi terhadap perubahan global.

Di samping itu juga, siri jerayawara (*roadshow*) berkaitan amalan-amalan yang boleh dikategorikan mempunyai elemen buruh paksa kepada pemain industri sawit Malaysia turut diadakan. Program oleh Pertubuhan Buruh Antarabangsa (ILO) bermatlamat untuk meningkatkan kesedaran pemain industri sawit terhadap isu berkaitan buruh paksa serta hak asasi manusia yang berkemungkinan boleh menjejaskan syarikat mereka di masa hadapan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN
DARIPADA : YB TUAN RAMLI BIN DATO' MOHD NOR
KAWASAN : CAMERON HIGHLANDS
TARIKH : 17 NOVEMBER 2020 (SELASA)

SOALAN NO. 19

minta **MENTERI KANAN KERJA RAYA** menyatakan adakah pihak Kementerian berhasrat untuk membaik pulih jalan yang rosak serta menaik taraf jalan utama di daerah Cameron Highlands memandangkan kawasan tersebut menjadi tempat tumpuan dan tarikan pelancong dari dalam dan luar negara serta sekaligus dapat mengelakkan kesesakan lalu lintas.

JAWAPAN

Tuan Yang Di-Pertua,

Untuk makluman Ahli Yang Berhormat, Kementerian Kerja Raya sentiasa mengambil perhatian ke atas masalah kerosakan jalan Persekutuan yang berlaku di Daerah Cameron Highlands. Bagi tahun 2021, Kementerian Kerja Raya telah **merancang sebanyak 16 bilangan** kerja pembaikan jalan di bawah program penyenggaraan berkala pavemen (BP) dengan nilai keseluruhan kerja sebanyak RM7.5 juta. Kerja – kerja ini akan dilaksanakan secara Arahan Kerja (AK) kepada syarikat konsesi dan tertakluk kepada peruntukan yang diluluskan oleh Kementerian Kewangan serta senarai keutamaan kerja yang disediakan oleh Jabatan Kerja Raya berdasarkan penilaian tahap kritikal kerosakan jalan bagi keseluruhan jaringan Jalan Persekutuan di bawah seliaan Kementerian ini.

Untuk makluman Ahli Yang Berhormat juga, **jumlah panjang Jalan Persekutuan di kawasan Parlimen Cameron Highlands** yang disenggara oleh syarikat konsesi adalah **sepanjang 86.86 km**. Kementerian ini telah memperuntukkan sebanyak **RM 1.8 juta setahun bagi penyenggaraan rutin** di jalan Persekutuan **kawasan Parlimen Cameron Highlands**. Kementerian ini juga telah memperuntukkan sebanyak **RM 9.8 juta bagi tahun 2018 hingga 2020** bagi kerja-kerja **penyenggaraan berkala**.

Kementerian sedang melaksanakan **Kajian Kesesakan Lalulintas Cameron Highlands, Pahang** yang dijangka siap pada September 2021 bagi mendapatkan penyelesaian untuk mengatasi kesesakan di Cameron Highland. Penilaian akan dilaksanakan untuk menentukan sama ada jajaran jalan baharu dan/atau menaik taraf jalan sedia ada diperlukan. Ini mengambil kira *return of investment* dengan izin, kepada pelaksanaan cadangan projek termasuk isu berkaitan impak alam sekitar dan juga impak sosial yang seterusnya mendatangkan manfaat kepada kerajaan dan juga rakyat.

NO SOALAN : 19

Merujuk kepada Belanjawan 2021, Kerajaan mengumumkan bakal meluluskan Projek Jalan Pintasan Cameron Highlands, Pahang dengan penekanan langkah pemuliharaan alam sekitar. Maka, hasil penemuan kajian yang dilaksanakan oleh Kementerian akan dijadikan panduan untuk kerja-kerja awalan projek tersebut.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : PUAN HAJAH FUZIAH BINTI SALLEH
[KUANTAN]**

TARIKH : 17 NOVEMBER 2020 (SELASA)

SOALAN

PUAN HAJAH FUZIAH BINTI SALLEH [KUANTAN] minta **PERDANA MENTERI** menyatakan apakah langkah-langkah yang diambil oleh Kerajaan dalam usaha membangunkan wakaf sebagai sektor ketiga ekonomi negara. Bagaimana pula peranan yang boleh di mainkan oleh institusi waqaf dalam membina sosioekonomi umat Islam.

JAWAPAN

**YB SENATOR DATUK DR. HAJI ZULKIFLI MOHAMAD AL-BAKRI,
MENTERI DI JABATAN PERDANA MENTERI (HAL EHWAL AGAMA)**

Tuan Yang di-Pertua,

1. Sebagaimana Ahli Yang Berhormat sedia maklum, wakaf adalah termasuk dalam senarai bidang kuasa negeri mengikut Butiran 1, Senarai 2, Jadual Kesembilan, Perlembagaan Persekutuan. Oleh itu, Majlis Agama Islam Negeri-negeri (MAIN) selaku pemegang amanah tunggal bagi semua urusan wakaf di negeri masing-masing adalah bertanggungjawab untuk memastikan wakaf diuruskan dengan sebaiknya.
2. Kerajaan berazam untuk membangunkan wakaf sebagai sektor ketiga ekonomi negara dengan berperanan mengurangkan penggantungan terhadap perbelanjaan dan kutipan cukai. Hasrat Kerajaan pada masa kini adalah menjadikan wakaf sebagai sektor ketiga ekonomi negara sebagai pelengkap kepada sektor pertama (Kerajaan)

dan sektor kedua (swasta). Bagi tujuan ini, Yayasan Waqaf Malaysia (YWM) dalam fasa akhir mewujudkan Tabung Wakaf Pendidikan Negara dengan kerjasama Kementerian Pendidikan Malaysia dan Tabung Wakaf Kesihatan Negara dengan kerjasama Kementerian Kesihatan Malaysia yang mana manfaat dana ini kelak boleh membantu membaik pulih / pembangunan infra / fasiliti pendidikan dan kesihatan. Terkini, YWM akan bekerjasama dengan Kementerian Alam Sekitar dan Air (KASA) mengenai pelaksanaan cadangan penubuhan Tabung Wakaf Air Malaysia merangkumi pembiayaan pelaksanaan projek-projek pemuliharaan sumber air, projek kecemasan bekalan air dan projek penyelenggaraan bekalan air sedia ada yang telah merosot di kawasan luar bandar.

3. Peranan yang boleh di mainkan oleh institusi wakaf dalam membina sosioekonomi umat Islam ialah Kerajaan menerusi Jabatan Wakaf, Zakat dan Haji (JAWHAR), Yayasan Waqaf Malaysia (YWM) bersama MAIN sentiasa berkerjasama untuk memajukan harta wakaf bagi memperkasakan lagi sosioekonomi umat Islam di seluruh negara. Sehingga kini, JAWHAR telah berjaya membangunkan 18 projek berimpak besar, dimana 17 buah projek pembangunan tersebut telah siap dan beroperasi. Manakala satu (1) projek fizikal lagi masih dalam pembinaan.

4. Peruntukan bajet pembangunan dalam Rancangan Malaysia ke Sembilan (RMKe-9), RMKe-10, RMKe-11 dan RMKe-12 membuktikan kesungguhan Kerajaan dalam memajukan tanah-tanah wakaf bagi memantapkan ekonomi orang Islam di seluruh negara merangkumi program pembangunan ekonomi, penyediaan perumahan, pendidikan, kesihatan, sosial dan premis perniagaan dalam fokus untuk meningkatkan taraf sosial ekonomi umat Islam dan ianya telah dilihat memberi impak berganda yang amat positif kepada masyarakat Islam secara khususnya selain daripada mampu menjana hasil berterusan kepada dana wakaf MAIN yang berkenaan. Sebagai contoh, projek perumahan di Sungai Nibong dan Butterworth Pulau Pinang telah membuktikan kejayaan Kerajaan dalam Dasar Perumahan Mampu Milik Negara dengan memberikan unit perumahan yang berkualiti kepada masyarakat setempat selaras dengan konsep Satu Keluarga Satu Rumah.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN
DARIPADA : YB DATO' DR. HASAN BIN BAHROM
KAWASAN : TAMPIN
TARIKH : 17 NOVEMBER 2020 (SELASA)

SOALAN NO. 21

minta **MENTERI KANAN KERJA RAYA** menyatakan adakah Kerajaan mempunyai hasrat untuk membina jajaran jalan raya empat Lorong antara Gemas dan Tampin, memandangkan kewujudan Kem Tentera Sirajuddin di Gemas. Kalau ya, bila ia akan dilaksanakan dan kalau tidak, mengapa. Sedangkan keselamatan negara adalah penting dan perlu diberi keutamaan.

JAWAPAN

Tuan Yang Di-Pertua,

Untuk makluman Ahli Yang Berhormat, Kementerian ini pernah mengangkat permohonan Menaiktaraf Jalan Senawang – Gemas, Laluan Persekutuan 1 (FT001) di dalam *Rolling Plan* 1 (RP1), RMKe-11. Namun demikian, permohonan tersebut tidak mendapat kelulusan Agensi Pusat dalam tempoh tersebut. Selain itu, berdasarkan kepada data banci *Road Traffic Volume Malaysia* (RTVM) 2019, aliran trafik di kawasan ini masih lancar dan stabil di tahap *Level Of Service* (LOS) A dan B serta belum mencapai kapasiti aliran trafik yang telah ditetapkan.

Untuk makluman Ahli Yang terhormat juga, projek ini tiada dalam senarai keutamaan yang diterima daripada Negeri Sembilan untuk *Rolling Plan* 1 (RP1) RMKe-12. Walau bagaimanapun, Kementerian ini akan meneliti semula projek ini sekiranya dimohon untuk *Rolling Plan* RMKe-12 yang akan datang dan memenuhi keperluan teknikal untuk dinaiktaraf. Kelulusan projek adalah bergantung kepada Agensi Pusat berdasarkan keutamaan dan kedudukan kewangan Kerajaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : YB TUAN WONG CHEN [SUBANG]

TARIKH : 17 NOVEMBER 2020 (SELASA)

SOALAN

TUAN WONG CHEN [SUBANG] minta **PERDANA MENTERI** menyatakan adakah Ahli-Ahli Parlimen boleh diberi akses penuh kepada syarat penuh perjanjian penyelesaian 1MDB-Goldman Sachs dan berikan perincian aset curian bernilai AS\$1.4 bilion yang telah dijamin oleh Goldman Sachs.

JAWAPAN

**YB DATO' TAKIYUDDIN BIN HASSAN, MENTERI DI JABATAN
PERDANA MENTERI (PARLIMEN DAN UNDANG-UNDANG)**

Tuan Yang di-Pertua,

Berdasarkan perjanjian penyelesaian antara Kerajaan Malaysia, 1MDB dan Menteri Kewangan (Diperbadankan) dengan Goldman Sachs (selepas ini dirujuk sebagai Perjanjian Penyelesaian 1MDB-Goldman Sachs), terdapat klausa yang memperuntukkan bahawa segala terma dan syarat dalam Perjanjian Penyelesaian 1MDB-Goldman Sachs adalah terikat dengan klausa kerahsiaan melainkan dipersetujui sebaliknya oleh pihak-pihak kepada Perjanjian itu. Klausa kerahsiaan ini juga terpakai bagi peruntukan mengenai jaminan AS\$1.4 bilion daripada Goldman Sachs ke atas aset curian.

Oleh yang demikian, berdasarkan klausa kerahsiaan tersebut, Kerajaan tidak dapat memberikan akses kepada perincian Perjanjian Penyelesaian 1MDB-Goldman Sachs sebagaimana yang dipohon untuk mengelakkan sebarang tindakan undang-undang diambil akibat pelanggaran terma perjanjian. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATUK DR. JEFFREY GAPARI KITINGAN
[KENINGAU]**

TARIKH : 17 NOVEMBER 2020 (SELASA)

SOALAN

DATUK DR. JEFFREY GAPARI KITINGAN [KENINGAU] minta **PERDANA MENTERI** menyatakan memandangkan Kerajaan Perikatan Nasional (PN) telah aku janji menunaikan obligasi-obligasi di bawah Perjanjian Malaysia 1963 (MA63), apakah rancangan Kerajaan untuk melaksanakan dan mengoperasikannya. Bilakah dijangkakan hasil-hasil pelaksanaannya.

JAWAPAN

**YB DATO' HAJAH HANIFAH HAJAR TAIB
TIMBALAN MENTERI DI JABATAN PERDANA MENTERI
(HAL EHWAL SABAH DAN SARAWAK)**

Tuan Yang di-Pertua,

1. Bagi menzahirkan komitmen dan keseriusan Kerajaan berhubung usaha-usaha untuk mengembalikan hak-hak negeri Sabah dan negeri Sarawak seperti mana yang termaktub di dalam Perlembagaan Persekutuan dan Perjanjian Malaysia 1963 (MA63), Jemaah Menteri pada 9 September 2020 yang lalu telah bersetuju dengan penubuhan Majlis Khas Mengenai Perjanjian Malaysia 1963 (**Majlis Khas MA63**). Keputusan Jemaah Menteri ini telah diumumkan sendiri oleh YAB Perdana Menteri sewaktu sambutan Hari Malaysia di Sibu, Sarawak pada 16 September 2020 yang lalu. Penubuhan Majlis Khas ini adalah selaras dengan syor dan keputusan Jawatankuasa Khas Kabinet Untuk

Menyemak Pelaksanaan Perjanjian Malaysia 1963 (JKKK MA63) yang telah dibubarkan pada 18 November 2019 di bawah Kerajaan terdahulu.

2. Kerajaan pada masa kini sedang memuktamadkan struktur dan komposisi Majlis Khas MA63. Pada dasarnya, Majlis Khas MA63 akan dipengerusikan oleh YAB Perdana Menteri dan turut dianggotai oleh YAB Ketua Menteri Sabah, YAB Ketua Menteri Sarawak serta beberapa orang Menteri Persekutuan yang berkaitan. Majlis Khas ini dijangka akan bersidang buat kali yang pertama pada bulan November ini bagi membincangkan serta membuat ketetapan berhubung perkara-perkara yang penting dan perlu dipercepatkan diselesaikan. Selain itu, Majlis Khas juga akan meneliti isu-isu yang berbangkit berhubung pelaksanaan keputusan-keputusan di bawah Jawatankuasa Kabinet terdahulu bagi memastikan perkara-perkara yang boleh diselesaikan atau dengan izin, "*low hanging fruit*" dilaksanakan dengan segera. Ini menunjukkan keikhlasan Kerajaan Persekutuan dalam menjamin hak-hak negeri Sabah dan negeri Sarawak dilaksanakan selaras dengan hak-hak yang dijamin di bawah undang-undang dan perlembagaan negara. Majlis Khas ini akan diurusetikan oleh Bahagian Hal Ehwal Sabah dan Sarawak, Jabatan Perdana Menteri (BHES), yang bertanggungjawab memastikan isu-isu yang berkaitan dengan MA63 dapat diselesaikan dan dilaksanakan dengan telus dan berkesan.

3. Dalam hal ini, Bahagian Hal Ehwal Sabah dan Sarawak, Jabatan Perdana Menteri (**BHES**) akan memantau rapi pelaksanaan keputusan-keputusan yang telah dicapai di bawah Jawatankuasa Kabinet terdahulu oleh jawatankuasa kerja-jawatankuasa kerja yang telah ditubuhkan di peringkat Kementerian/Agensi Persekutuan yang terlibat dalam proses semakan pelaksanaan MA63 sebelum ini. Setiap kementerian/agensi terlibat akan mengemukakan pelaporan secara berkala kepada BHES dan pelaporan ini akan dibentangkan di peringkat Majlis Khas MA63.

4. Kerajaan yakin bahawa kejayaan dalam agenda ini akan meredakan ketidak-puasan hati rakyat di negeri Sabah dan Sarawak yang selama ini merenggangkan perpaduan dan integriti wilayah yang kukuh serta sekaligus akan dapat memperkasakan patriotisma dan nasionalisma negara bangsa.

Sekian, terima kasih.

**PEMBERITAHUAN PERTANYAAN LISAN
DEWAN RAKYAT MESYUARAT KETIGA,
PENGKAL KETIGA, PARLIMEN KEEMPAT BELAS**

PERTANYAAN : LISAN

**DARIPADA : TUAN AKMAL NASRULLAH BIN MOHD. NASIR
[JOHOR BAHRU]**

TARIKH : 17 NOVEMBER 2020 (SELASA)

SOALAN

Minta **MENTERI PEMBANGUNAN USAHAWAN DAN KOPERASI** menyatakan adakah terdapat keperluan untuk mewujudkan dana tambahan bagi Skim Mikrokredit kelolaan Bank Simpanan Nasional (BSN) disebabkan masih ramai peniaga-peniaga kecil yang memerlukannya.

JAWAPAN

Tuan Yang di-Pertua,

1. Sejak penubuhan TEKUN Nasional pada 1999 sehingga Oktober 2020, TEKUN telah menerima dana pembiayaan sebanyak RM3.51 billion dengan tujuan membantu peniaga-peniaga kecil untuk mendapatkan modal bagi menjalankan urusan perniagaan.
2. Sehingga kini, TEKUN telah menyalurkan sebanyak RM6.3 billion dana pembiayaan yang telah memberi manfaat kepada 470,862 orang usahawan mikro.
3. Bagi tempoh Januari – Mac 2020 sebelum penularan pandemik Covid-19, TEKUN telah menyalurkan dana pembiayaan kepada 4,304 usahawan bernilai RM91.1 juta. Walau bagaimanapun, sehingga Oktober 2020, bilangan usahawan yang menerima dana pembiayaan TEKUN meningkat kepada 29,262 usahawan.
4. Secara purata bilangan usahawan yang menerima dana pembiayaan TEKUN meningkat daripada 1,435 usahawan sebulan kepada 3,565 usahawan sebulan semasa tempoh Covid-19.
5. Berdasarkan peningkatan ini, usahawan mikro amat memerlukan dana pembiayaan tambahan bagi kelangsungan perniagaan mereka.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN
DARIPADA : YB TUAN TONY PUA KIAM WEE
KAWASAN : DAMANSARA
TARIKH : 17 NOVEMBER 2020 (SELASA)

SOALAN NO. 25

minta **MENTERI KANAN KERJA RAYA** menyatakan kedudukan penstrukturan semula syarikat Lebuhraya Utara Selatan, sama ada perjanjian penstrukturan telah dimuktamadkan. Apakah penemuan kajian terhadap lebuhraya-lebuhraya bertol yang diumumkan pada bulan Jun 2020.

JAWAPAN

Tuan Yang Di-Pertua,

Untuk makluman Ahli Yang Berhormat, hasil bagi kajian yang diumumkan pada Jun 2020 tersebut telah diselaraskan melalui penyediaan Memorandum Jemaah Menteri Bersama Hala tuju Industri Lebuhraya Bertol di Malaysia di antara Kementerian Kerja Raya, Kementerian Kewangan dan Unit Kerjasama Awam Swasta, Jabatan Perdana Menteri dijangka akan dibentangkan kepada Jemaah Menteri untuk pertimbangan dan kelulusan pada pertengahan November ini. Kedudukan penstrukturan semula Kumpulan PLUS Malaysia Berhad hanya akan dimuktamadkan tertakluk kepada keputusan syor MJM Bersama Hala tuju Industri Lebuhraya Bertol di Malaysia berkenaan.

Sekian, terima kasih.

**PEMBERITAHUAN PERTANYAAN JAWAB LISAN
DEWAN RAKYAT MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN JUGAH ANAK MUYANG @ TAMBAT
[LUBOK ANTU]**

TARIKH : 17 NOVEMBER 2020 (SELASA)

SOALAN

TUAN JUGAH ANAK MUYANG @ TAMBAT [LUBOK ANTU] minta
MENTERI PERUSAHAAN PERLADANGAN DAN KOMODITI
menyatakan langkah-langkah atau tindakan yang diambil bagi
memperkasakan ekonomi pekebun-pekebun kecil Kelapa Sawit di
Parlimen P.203 Lubok Antu, Sarawak.

JAWAPAN

Tuan Yang Di-Pertua,

Antara usaha yang telah dan sedang dijalankan oleh Kerajaan bagi memperkasakan pekebun kecil sawit di Malaysia termasuk pekebun kecil di Parlimen Lubok Antu, Sarawak adalah seperti berikut:

- i. Bagi meringankan kos yang ditanggung oleh pekebun kecil, Kerajaan bersetuju menanggung sepenuhnya kos yang terlibat termasuk yuran audit persijilan, set pakaian keselamatan, rak penyimpanan racun, fi pertukaran syarat tanah dan kos latihan berkaitan dengan pensijilan MSPO. Pensijilan MSPO merupakan satu usaha Kerajaan untuk menjenamakan minyak sawit Malaysia yang berkualiti dan dihasilkan mengikut kaedah mampan. Pensijilan MSPO dapat meningkatkan dan memperluaskan pasaran minyak sawit di dalam dan luar negara. Ini akan memberi kesan secara tidak langsung kepada pekebun kecil untuk meningkatkan hasil dan pendapatan mereka;
- ii. Bagi menggalakkan pekebun kecil melaksanakan penanaman semula sawit untuk menggantikan pokok sawit yang telah tua atau tidak produktif, Kerajaan telah memperkenalkan Skim Pembiayaan Mudah Tanam Semula Pekebun Kecil Sawit (TSPKS) dan Skim Pembiayaan Mudah Input Pertanian Pekebun Kecil Sawit (IPPKS) yang melibatkan jumlah peruntukan RM550 juta;
- iii. Bagi mengurangkan pergantungan sepenuhnya kepada hasil sawit serta memberikan pendapatan tambahan kepada pekebun kecil, Kerajaan telah melaksanakan Skim Insentif Integrasi Ternakan dengan Sawit (ITe). Pekebun kecil yang layak akan menerima ternakan seperti lembu atau kambing, mesin perincih, ubat-ubatan asas dan latihan amalan baik pengendalian ternakan. Kementerian bersama Kementerian Pertanian dan Industri Makanan (MAFI) juga sedang melaksanakan Skim Bantuan Tanaman Kontan untuk golongan B40 (TKB40). Tanaman kontan yang terlibat adalah tanaman yang bernilai tinggi dan mudah dipasarkan iaitu pisang dan

nanas. Kedua-dua skim ini dilihat sebagai alternatif bagi memberi peluang kepada pekebun kecil bagi meningkatkan sumber pendapatan sedia ada mereka selain sawit.

iv. Bagi menggalakkan pekebun kecil menyertai aktiviti berteraskan perniagaan, mereka digalakkan untuk menyertai Koperasi Penanam Sawit Mampan (KPSM). Kerajaan memberikan insentif sebanyak RM200,000 bagi sebuah KPSM untuk menubuhkan pusat timbang bagi memudahkan urusan jualan hasil Buah Tandan Segar (BTS) ahli-ahlinya secara berkelompok secara terus ke kilang. Kementerian Kewangan juga telah meluluskan kenaikan had Skim Pinjaman Mudah Modal Pusingan dari RM100,000 kepada RM200,000. Ini adalah bertujuan untuk meningkatkan keupayaan KPSM dalam urusan jual beli BTS. Kerajaan berharap akan lebih ramai para pekebun kecil sawit untuk menyertai KPSM yang telah ditubuhkan; dan

v. Bagi meningkatkan pengetahuan, pekebun kecil sawit juga diberi khidmat nasihat serta tujuk ajar terutama dalam Amalan Pertanian Baik (APB) oleh Pegawai TUNAS. Amalan pertanian seperti kaedah pembajaan, penggunaan anak sawit berkualiti, penuaian berkesan, pengurusan perosak dan kesedaran merekod aktiviti pengurusan sawit telah diterapkan bagi memastikan produktiviti dan pendapatan pekebun kecil meningkat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : YB TUAN DATUK SERI PANGLIMA
MADIUS TANGAU [TUARAN]**

TARIKH : 17 NOVEMBER 2020 (SELASA)

SOALAN

Minta **PERDANA MENTERI** menyatakan berapa bilangan pelarian perang Filipina yang berada di Sabah pada ketika ini dan sampai bilakah mereka ini dibenarkan tinggal di Sabah.

JAWAPAN

**YB DATUK SERI MOHD REDZUAN BIN MD. YUSOF,
MENTERI DI JABATAN PERDANA MENTERI (TUGAS-TUGAS KHAS)**

Tuan Yang di-Pertua,

1. Hasil daripada semakan silang yang dilaksanakan oleh Majlis Keselamatan Negara Negeri Sabah, Jabatan Imigresen Negeri Sabah dan Jabatan Ketua Menteri Sabah pada tahun 2016, pihak kerajaan telah mengenalpasti seramai **136,055 orang pelarian Filipina** yang berada di negeri Sabah. Daripada jumlah tersebut, Kerajaan mengklasifikasikan mereka kepada 3 kategori iaitu:

- i. **51,645 orang** - Pemegang pas IMM13;
- ii. **47,518 orang** - Pemegang Sijil Bancian Pasukan Petugas Khas Persekutuan Sabah/Labuan **(pelarian tanpa pas IMM13)**; dan
- iii. **36,892 orang** – Pemegang Sijil Burung-Burung **(pelarian tanpa pas IMM13)**.

2. Seperti mana yang dimaklumkan oleh Menteri Dalam Negeri pada 14 Jun 2020, kerajaan akan melaksanakan penyelarasan kepelbagaian dokumen pelarian perang Filipina di Sabah, di mana IMM13 ini akan menjadi dokumen tunggal bagi pelarian Filipina di Sabah yang dilaksanakan secara berperingkat.

3. IMM13 merupakan dokumen yang perlu diperbaharui setiap tahun dan mempunyai syarat yang ketat terhadap pemegangnya. Pemegang IMM13 perlu memperbaharui dokumen berkenaan untuk memastikan mereka sah berada di negeri Sabah. Bagi pemegang IMM13 yang tamat tempoh atau melakukan kesalahan jenayah, mereka akan diusir serta disenarai hitamkan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : YB TUAN SU KEONG SIONG [KAMPAR]

TARIKH : 17 NOVEMBER 2020 (SELASA)

SOALAN

Minta **PERDANA MENTERI** menyatakan secara terperinci peranan, tugas-tugas dan portfolio pelantikan YB Marang sebagai Duta Khas YAB Perdana Menteri ke Timur Tengah Bertaraf Menteri. Nyatakan pencapaian beliau sebagai Duta Khas Timur Tengah semenjak penjawatan pada 2 April 2020.

JAWAPAN

**YB DATUK SERI MOHD REDZUAN BIN MD. YUSOF,
MENTERI DI JABATAN PERDANA MENTERI (TUGAS-TUGAS KHAS)**

Tuan Yang di-Pertua,

1. Untuk makluman Ahli Yang Berhormat, tugas Duta Khas YAB Perdana Menteri ke Timur Tengah adalah untuk membantu dan menasihati YAB Perdana Menteri dalam isu-isu Timur Tengah dan perkara-perkara yang berhubung kait dengan kepentingan Malaysia di rantau tersebut. Ia meliputi dalam bidang agama Islam, Pendidikan, Perdagangan dan Pelaburan.
2. Sejak dilantik, Yang Berhormat Duta Khas telah melakukan gerak kerja meneroka peluang-peluang untuk Malaysia memanfaatkan hubungan diplomatik yang baik dengan negara-negara Timur Tengah. YB Duta Khas telah mengadakan perbincangan dengan YB Menteri Luar dan agensi-agensi berkaitan. Selain itu, Yang Berhormat Duta Khas juga telah mengadakan perjumpaan dan menerima kunjungan hormat Duta-Duta negara Timur Tengah seperti Arab Saudi, Yaman, Qatar, Iran, Oman, Afghanistan, Syria dan Bahrain dan mendapat maklum balas langsung dalam usaha mengeratkan hubungan dua hala melibatkan kerjasama agama Islam, politik, ekonomi, pelaburan dan pendidikan.
3. Hasil kerja dan laporan oleh Duta Khas ini dilaporkan terus kepada YAB Perdana Menteri.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : YB TUAN TONY PUA KIAM WEE
[DAMANSARA]**

TARIKH : 17 NOVEMBER 2020 (SELASA)

SOALAN

TUAN TONY PUA KIAM WEE [DAMANSARA] minta **PERDANA MENTERI** menyatakan kedudukan terkini tuntutan Kerajaan Malaysia untuk membatalkan perjanjian penyelesaian antara 1MDB dan IPIC di mahkamah London dan apakah langkah seterusnya yang akan diambil oleh Kerajaan, termasuk anggaran jangka masa yang diperlukan.

JAWAPAN

**YB DATO' TAKIYUDDIN BIN HASSAN, MENTERI DI JABATAN
PERDANA MENTERI (PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, buat masa ini, Kerajaan sedang meneruskan tindakan undang-undang untuk membatalkan perjanjian penyelesaian antara 1MDB dan IPIC di Mahkamah di London, United Kingdom. Terdapat pelbagai prosiding interlokutori yang telah difailkan sama ada oleh Kerajaan Malaysia atau pihak IPIC/Aabar yang masing-masingnya sedang dicabar oleh pihak bertentangan.

Dalam hal ini, Kerajaan sentiasa bersifat terbuka untuk mempertimbangkan apa-apa bentuk penyelesaian sekiranya terdapat tawaran yang sejajar dengan prinsip dan tanggungjawab Kerajaan Malaysia, iaitu untuk memastikan aset-aset negara dipulangkan dan pada masa yang sama, memastikan keadilan dapat ditegakkan.

Sekian, terima kasih.

**PEMBERITAHUAN PERTANYAAN DEWAN
RAKYAT MESYUARAT KETIGA, PENGGAL
KETIGA, PARLIMEN KEEMPAT BELAS**

PERTANYAAN : LISAN

**DARIPADA : TUAN SIM CHEE KEONG
[BUKIT MERTA JAM]**

TARIKH : 17 NOVEMBER 2020 (SELASA)

SOALAN

Minta **MENTERI BELIA DAN SUKAN** menyatakan status guna tenaga tidak penuh, (underemployment) belia, mengikut pecahan kebangsaan, negeri, umur, jantina dan kelulusan akademik, Adakah Kementerian bercadang untuk mengemukakan data bagi NEET (not in education, employment, and training) bagi golongan belia.

JAWAPAN

Yang di-Pertua,

1. Menurut Jabatan Statistik Malaysia / *Department of Statistic Malaysia* (DOSM), mereka yang sedang bekerja dan bekerja kurang daripada 30 jam semasa minggu rujukan disebabkan oleh bentuk kerja mereka atau disebabkan kurang kerja dan berkeupayaan serta sanggup menerima beban kerja tambahan dianggap sebagai guna tenaga tidak penuh dan dimasukkan dalam kategori 'bekerja'.
2. Merujuk kepada Statistik Perangkaan Utama Tenaga Buruh Malaysia Bagi Tahun 2001 hingga 2019, penduduk Malaysia yang di dalam kategori 'bekerja' adalah sebanyak 9.357 juta pada tahun 2001 dan terdapat peningkatan, menjadikan jumlah 'bekerja' bagi tahun 2019 ialah seramai 15.073 juta orang.
3. Selain itu, merujuk kepada Statistik Penduduk Bekerja Kurang Daripada 30 Jam Mengikut Sektor di Malaysia Tahun 2019 adalah menunjukkan bahawa 'Sektor Perkhidmatan' mempunyai jumlah tenaga buruh yang paling tinggi iaitu sebanyak 198,600 orang manakala 'Sektor

Perlombongan dan Pengkuarian' menunjukkan jumlah tenaga buruh yang paling rendah iaitu sebanyak 200 orang.

4. Manakala bagi data NEET yang bermaksud tidak terlibat dengan sebarang program pendidikan, tidak bekerja, dan juga tidak melibatkan diri dengan sebarang program latihan kemahiran, KBS telah menerima data Statistik Belia NEET (Not in Education, Employment or Training) Mengikut Negeri dan Jantina Bagi Tahun 2016, 2017 dan 2018 daripada pihak DOSM. Data tersebut adalah bagi kategori umur 15 hingga 24 tahun sahaja.

5. Merujuk kepada statistik tersebut didapati bahawa pada tahun 2016 sejumlah 711,650 belia berada di dalam kategori NEET.

6. Berdasarkan negeri, daripada jumlah tersebut (711,650 orang), negeri tertinggi mencatatkan jumlah belia dalam kategori NEET adalah di negeri Sabah iaitu sebanyak 217,819 belia manakala negeri yang paling rendah mencatatkan data belia NEET adalah negeri Wilayah Persekutuan Putrajaya iaitu sebanyak 518 belia.

7. Berdasarkan jantina, daripada jumlah tersebut juga (711,650 orang), sejumlah 266,753 orang merupakan lelaki dan 444,897 adalah perempuan.

8. Terdapat peningkatan jumlah belia bagi kategori NEET ini menjadikan jumlah keseluruhan pada tahun 2018 adalah sebanyak 765,841 belia (15 hingga 24 tahun).

9. Daripada jumlah tersebut (765,841 orang), negeri tertinggi mencatatkan jumlah belia dalam kategori NEET adalah negeri Sabah iaitu sebanyak 230,457 manakala negeri yang paling rendah mencatatkan data belia NEET adalah negeri Wilayah Persekutuan Putrajaya iaitu sebanyak 623 belia.

10. Daripada jumlah tersebut juga (765,841 orang), sejumlah 292,732 adalah belia lelaki dan 473,109 orang adalah belia perempuan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : TUAN KHOO POAY TIONG [KOTA MELAKA]

TARIKH : 17 NOVEMBER 2020 (SELASA)

SOALAN

TUAN KHOO POAY TIONG [KOTA MELAKA] minta PERDANA MENTERI menyatakan status siasatan kes ketidakpatuhan kuarantin oleh Menteri Perusahaan Perladangan dan Komoditi selepas pulang dari luar negara dan adakah beliau akan didakwa di mahkamah seperti yang telah terjadi kepada orang awam lain.

JAWAPAN

**YB DATO' TAKIYUDDIN BIN HASSAN,
MENTERI DI JABATAN PERDANA MENTERI (PARLIMEN DAN
UNDANG-UNDANG)**

Tuan Yang di-Pertua,

Untuk makluman Ahli Yang Berhormat, Jabatan Peguam Negara telah membuat kenyataan media bertarikh 21 Oktober 2020, menjelaskan mengenai tindakan yang diambil berhubung dengan kes YB Menteri Perusahaan Perladangan dan Komoditi. Dimana siasatan mengenai aduan yang dibuat terhadap YB Menteri di bawah Akta Pencegahan dan Pengawalan Penyakit Berjangkit 1988 [*Akta 342*] telah selesai dijalankan oleh pihak PDRM dan kertas siasatan telah dikemukakan kepada Jabatan Peguam Negara pada 1 Oktober 2020.

Seterusnya hasil penelitian Jabatan Peguam Negara dari sudut keterangan mendapati bahawa YB Menteri tidak pernah diserahkan dengan Borang 14b seperti yang diperuntukkan dalam Garis Panduan Kementerian Kesihatan Malaysia yang mengandungi perintah pemerhatian atau pengawasan di bawah subseksyen 15(1) Akta 342 supaya YB Menteri menjalani kuarantin.

Berdasarkan keterangan tersebut, Peguam Negara memutuskan untuk tidak mengemukakan sebarang pertuduhan terhadap YB Menteri memandangkan tiada keterangan yang kukuh untuk mengasaskan suatu pertuduhan di bawah Akta 342 atau perundangan subsidiari yang dibuat di bawahnya. Keputusan Peguam Negara adalah selaras dengan Fasal (3) Perkara 145 Perlembagaan Persekutuan yang memperuntukkan bahawa keputusan untuk memulakan, menjalankan, atau memberhentikan apa-apa prosiding bagi sesuatu kesalahan merupakan budi bicara Pendakwa Raya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATUK IGNATIUS DARELL LEIKING
[PENAMPANG]**

TARIKH : 17 NOVEMBER 2020 (SELASA)

SOALAN

DATUK IGNATIUS DARELL LEIKING [PENAMPANG] minta **PERDANA MENTERI** menyatakan status 4 lagi perkara yang belum diputuskan oleh Majlis Khas MA63 yang diurusetiaikan oleh BHES mengenai Perlaksanaan Perjanjian Malaysia 1963 yang turut melibatkan tuntutan bayaran 20% setahun daripada hasil pengeluaran produk minyak dan gas dari Sabah.

JAWAPAN

**YB DATO' HAJAH HANIFAH HAJAR TAIB
TIMBALAN MENTERI DI JABATAN PERDANA MENTERI
(HAL EHWAL SABAH DAN SARAWAK)**

Tuan Yang di-Pertua,

1. Terdapat 4 perkara yang masih belum selesai atau tiada keputusan di bawah Jawatankuasa Khas Kabinet Untuk Menyemak Pelaksanaan Perjanjian Malaysia 1963 yang ditubuhkan di bawah Kerajaan terdahulu iaitu:

- (i) Royalti Minyak dan Bayaran Tunai Petroleum;**
- (ii) Mineral Minyak dan Medan Minyak;**
- (iii) Akta Laut Wilayah 2012 [Akta 750]; dan**

(iv) **Hak Negeri ke atas Pelantar Benua (Akta Pelantar Benua 1966 [Akta 83]).**

2. Status terakhir bagi keempat perkara ini adalah ia masih dalam peringkat rundingan dan dibincangkan secara tertutup di antara mantan YAB Perdana Menteri Ke-7 pada waktu itu bersama-sama dengan mantan YAB Ketua Menteri Sabah dan YAB Ketua Menteri Sarawak sehinggalah Kabinet terbubar susulan daripada perletakan jawatan oleh Ahli Parlimen Langkawi sebagai Perdana Menteri ke-7 pada 24 Januari 2019 yang lalu.

3. Oleh yang demikian, perbincangan berhubung perkara-perkara ini akan diteruskan dalam **Majlis Khas Mengenai Perjanjian Malaysia 1963** (Majlis Khas MA63) yang telah diluluskan penubuhannya oleh Jemaah Menteri pada 9 September 2020 yang lalu. Pada waktu yang sama, sebagai menunjukkan keprihatinan dan keihlasan Kerajaan Persekutuan bagi membantu Kerajaan Negeri Sarawak berhubung isu berkaitan tuntutan negeri berkaitan petroleum dan gas, YAB Perdana Menteri telah melantik YB Menteri Kewangan dan YB Menteri Kanan Kerja Raya untuk membincangkan perkara berkenaan royalti minyak bersama Petronas dan Kerajaan negeri Sarawak dalam satu Jawatankuasa Bersama yang mengurus setia oleh Kementerian Kewangan.

4. Memandangkan proses rundingan masih sedang berjalan, maklumat berkaitan terma-terma dan status atau *outcome* perkara-perkara yang sedang dirundingkan/dibincangkan dalam Jawatankuasa Bersama belum lagi selesai.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : YB DATUK HAJI AHMAD JAZLAN BIN
YAAKUB [MACHANG]**

TARIKH : 17 NOVEMBER 2020 (SELASA)

SOALAN

Minta **PERDANA MENTERI** menyatakan sejauh mana penutupan kelab-kelab malam sepanjang Perintah Kawalan Pergerakan Bersyarat (PKPB) dapat membantu mengekang penularan COVID-19 dan masalah sosial masyarakat serta adakah Kerajaan bersedia untuk menutup terus operasi kelab – kelab ini.

JAWAPAN

**YB DATUK SERI MOHD REDZUAN BIN MD. YUSOF,
MENTERI DI JABATAN PERDANA MENTERI (TUGAS-TUGAS KHAS)**

Tuan Yang di-Pertua,

1. Pihak Kerajaan telah memutuskan untuk tidak membenarkan pengoperasian kelab malam di negara ini. Penutupan sementara kelab – kelab malam di kawasan Perintah Kawalan Pergerakan Bersyarat (PKPB) adalah merupakan tindakan *pre-emptive* bagi penularan wabak COVID-19 di negara ini. Tindakan ini juga telah dibuat terlebih dahulu di negara luar seperti negara-negara di Eropah. Trend penularan kembali wabak juga telah dikesan di Korea Selatan akibat kluster kelab malam kerana kesukaran memastikan penjarakan sosial di dalam tempat seumpamanya.

2. Seperti kita semua maklum, aktiviti di kelab malam adalah aktiviti yang tidak dapat dikawal dan adalah sukar untuk dibuat penjarakan sosial dikalangan pengunjung. Pihak Berkuasa Tempatan (PBT)

bertanggungjawab dalam penarikan lesen premis terbabit sekiranya gagal mengikuti arahan yang telah dikeluarkan oleh Kerajaan.

3. Polis Diraja Malaysia (PDRM) turut bekerjasama dengan pihak berkuasa tempatan (PBT) untuk mengambil tindakan tegas terhadap premis pusat hiburan yang beroperasi lebih masa termasuk menarik balik permit. Berikut adalah maklumat ringkas data bagi Laporan Mingguan Op Noda mulai 01 Januari 2020 Hingga 01 November 2020; dan

KONTINJEN	KESELURUHAN OP NODA							
	JUMLAH PERMOHONAN UNTUK DI BATALKAN LESEN PUSAT HIBURAN YANG LANGGAR SYARAT LESEN	JUMLAH YANG DILULUSKAN (DIBATALKAN LESEN) DAN TELAH DIAMBIL TINDAKAN	JUMLAH PUSAT HIBURAN BEROPERASI TANPA LESEN SEMASA SERBUAN DIBUAT	SERBUAN BERJAYA	STATUS KERTAS SIASATAN			TANGKAPAN
					TUDUH	NFA	DALAM SIASATAN	
PERLIS	0	0	0	0	0	0	0	0
KEDAH	0	0	37	41	14	2	25	244
P.PINANG	0	0	32	57	23	12	22	406
PERAK	1	0	13	46	23	6	17	309
SELANGOR	0	0	56	606	413	59	134	2527
K.LUMPUR	84	0	203	276	189	21	66	1769
N.SEMBILAN	0	0	18	23	10	2	11	257
MELAKA	4	0	7	50	30	2	18	152
JOHOR	59	4	180	181	50	4	127	621
PAHANG	0	0	9	16	11	2	3	54
TERENGGANU	0	0	5	14	4	2	8	15
KELANTAN	0	0	0	0	0	0	0	0
SABAH	0	0	19	35	20	0	15	30
SARAWAK	0	0	24	41	21	7	13	467
JUMLAH	148	4	603	1386	808	119	459	6851

Sumber: PDRM

4. Tindakan Kerajaan menutup kelab-kelab malam ini sepanjang perintah PKPB adalah tindakan yang wajar dalam menangani masalah penularan wabak COVID-19. Walau bagaimanapun, Kerajaan tidak boleh menutup terus kelab-kelab malam tersebut selagi mana pematuhan terhadap SOP yang ditetapkan dipatuhi.

Sekian, terima kasih.

**PEMBERITAHUAN PERTANYAAN JAWAB LISAN
DEWAN RAKYAT MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : JAWAB LISAN

DARIPADA : TUAN SYED SADDIQ BIN SYED ABDUL RAHMAN [MUAR]

TARIKH : 17 NOVEMBER 2020 (SELASA)

SOALAN

TUAN SYED SADDIQ BIN SYED ABDUL RAHMAN [MUAR] minta **MENTERI PEMBANGUNAN WANITA, KELUARGA DAN MASYARAKAT** menyatakan untuk memberikan komitmen serta membentangkan rancangan untuk mengharamkan perkahwinan di bawah umur bagi memastikan eksploitasi kanak-kanak dapat dibendung.

JAWAPAN

Tuan Yang di-Pertua,

Selaras dengan obligasi negara terhadap Konvensyen Mengenai Hak Kanak-kanak (CRC), Kementerian ini berpegang kepada prinsip bahawa kanak-kanak seharusnya diberi peluang untuk merealisasikan potensi mereka sepenuhnya. Perkahwinan pada usia muda bercanggah dengan prinsip perkembangan kanak-kanak dan sewajarnya dielakkan kerana ia boleh memberi kesan terhadap hak kanak-kanak ke atas pendidikan, kesihatan reproduktif, kesihatan emosi dan mental. Perkara ini memerlukan perhatian yang serius dan perlu ditangani secara bersepadu oleh semua pihak.

Dalam hal ini, Kerajaan komited dalam meneruskan usaha bagi menangani perkahwinan bawah umur melalui pelaksanaan dan pemantauan Pelan Strategi Kebangsaan Bagi Menangani Punca Perkahwinan Bawah Umur yang telah diluluskan oleh Jemaah Menteri pada 8 Januari 2020.

Sebagaimana Yang Berhormat sedia maklum, Pelan ini dilaksanakan untuk sepanjang tempoh lima (5) tahun iaitu dari tahun 2020 sehingga 2025. Pada 24 Ogos 2020 yang lepas, satu Mesyuarat Jawatankuasa Pemandu telah bersidang yang bertujuan untuk memantau perkembangan program dan tindakan bagi setiap strategi di bawah Pelan tersebut.

Selain itu, Kementerian turut menyediakan satu pelan komunikasi strategik di samping merangka program advokasi secara menyeluruh sepanjang tempoh lima (5) tahun pelaksanaan Pelan ini.

Memandangkan Malaysia terdiri daripada masyarakat yang berbilang kaum yang mempunyai adat, budaya dan agama yang berlainan, maka perundingan dan sesi libat urus bersama pakar-pakar berkaitan termasuk pakar kanak-kanak, pakar budaya dan pakar syarie perlu dilaksanakan secara berterusan dan berperingkat bagi memastikan pandangan daripada semua pihak diambil kira dalam penetapan had minimum umur perkahwinan pada umur 18 tahun. Walau bagaimanapun, penetapan had umur ini juga adalah tertakluk pada kuasa Majlis Agama Islam Negeri.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN
DARIPADA : YB TUAN HAJI MOHAMAD BIN SABU
KAWASAN : KOTA RAJA
TARIKH : 17 NOVEMBER 2020 (SELASA)

SOALAN NO. 35

minta **MENTERI KANAN KERJA RAYA** menyatakan data daripada Polis Trafik Klang menunjukkan lebih 360 kes kemalangan berlaku di FT 190 dalam Parlimen Kota Raja dan salah satu sebab utamanya ialah keadaan jalan raya yang rosak dan tidak pernah diturap selama 20 tahun tetapi hanya ditampal sahaja. Maka adakah pihak Kerajaan merancang untuk menurap semula tar di FT 190 Jalan Kota Raja, FT 190 Jalan Kebun dan FT 190 Jalan Bukit Kemuning.

JAWAPAN

Tuan Yang Di-Pertua,

Untuk makluman Ahli Yang Berhormat, Kementerian Kerja Raya sentiasa mengambil perhatian ke atas masalah kerosakan jalan Persekutuan yang berlaku di FT190 dalam Parlimen Kota Raja.

Untuk makluman Ahli Yang Berhormat, jumlah panjang Jalan Persekutuan FT190 iaitu Jalan Kota Raja, Jalan Kebun dan Jalan Bukit Kemuning disenggara oleh syarikat konsesi adalah sepanjang 17.00 km. Sebanyak RM350 ribu setahun telah diperuntukkan bagi penyenggaraan rutin di jalan Persekutuan FT190 iaitu Jalan Kota Raja, Jalan Kebun dan Jalan Bukit Kemuning dan sebanyak RM5.4 juta bagi tahun 2018 hingga 2020 bagi kerja-kerja penyenggaraan berkala.

Bagi tahun 2021, Kementerian Kerja Raya telah merancang sebanyak 14 bilangan kerja pembaikan jalan di bawah program penyenggaraan berkala pavemen (BP) dengan nilai keseluruhan kerja sebanyak RM19.10 juta. Kerja – kerja ini akan dilaksanakan secara Arahan Kerja (AK) kepada syarikat konsesi dan tertakluk kepada peruntukan yang diluluskan oleh Kementerian Kewangan serta senarai keutamaan kerja yang disediakan oleh Jabatan Kerja Raya berdasarkan penilaian tahap kritikal kerosakan jalan bagi keseluruhan jaringan Jalan Persekutuan di bawah seliaan Kementerian ini.

Untuk makluman Ahli Yang Berhormat juga, pihak syarikat konsesi yang dilantik bertanggungjawab untuk melaksanakan kerja penyenggaraan rutin iaitu skop kerja penyenggaraan pavemen, penyenggaraan bahu jalan, potong rumput, perabot jalan, mencuci jambatan dan pembetung, mencuci longkang serta pemeriksaan rutin.

Syarikat konsesi juga melaksanakan kerja penyenggaraan berkala pavemen dan bukan pavemen yang dilaksanakan secara Arahan Kerja

NO SOALAN : 35

(AK) berdasarkan peruntukan yang diluluskan oleh Kementerian Kewangan. Selain itu, kerja kecemasan juga dilaksanakan oleh syarikat dengan membuat tindakan segera jika berlaku kejadian yang di luar jangka. Sebagai contoh, kerja membersihkan jalan setelah kejadian tanah runtuh, menyediakan pelan pengurusan trafik atau *Traffic Management Plan* (TMP) dan menyediakan laluan sementara bagi membolehkan jalan dilalui oleh kenderaan.

Kementerian Kerja Raya melalui Jabatan Kerja Raya sentiasa komited dalam memastikan tahap keadaan jalan sentiasa dalam keadaan yang selamat dan selesa.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : YB DATUK TUAN GOBIND SINGH DEO
[PUCHONG]**

TARIKH : 17 NOVEMBER 2020 (SELASA)

SOALAN

Minta **PERDANA MENTERI** menyatakan apakah rancangan Kerajaan untuk membantu barisan hadapan (*frontliners*) di negara kita yang membantu untuk memerangi wabak COVID-19. Nyatakan setakat mana rancangan-rancangan ini telah pun dilaksanakan dan keberkesanannya.

JAWAPAN

**YB DATUK SERI MOHD REDZUAN BIN MD. YUSOF,
MENTERI DI JABATAN PERDANA MENTERI (TUGAS-TUGAS KHAS)**

Tuan Yang di-Pertua,

1. Kerajaan prihatin dan sedar kepentingan barisan hadapan (*frontliner*) dalam mengatasi dan memerangi wabak COVID-19 di negara ini. Terdapat beberapa inisiatif Kerajaan yang telah dan akan dibuat dalam memastikan kebajikan mereka. Sejak Ogos yang lalu, kakitangan barisan hadapan telah menerima elaun khas yang berjumlah **RM222.4 juta membabitkan 694,447 tuntutan** dan sebanyak RM512.5 juta pula telah disalurkan dalam meningkatkan lagi keupayaan Kementerian Kesihatan Malaysia (KKM) untuk memerangi COVID-19.

2. Tuntutan Elaun Khas Barisan Hadapan tersebut diberikan kepada doktor, jururawat dan kakitangan perubatan lain yang terbabit secara langsung dalam pengurusan dan pembendungan wabak ini. Selain itu, Kerajaan juga telah memberikan Elaun Khas sebanyak **RM200 sebulan**

kepada anggota tentera, polis, kastam, imigresen, bomba, Angkatan Pertahanan Awam serta anggota Jabatan Sukarelawan Malaysia (RELA) yang telah bertugas secara langsung dalam tempoh pelaksanaan Perintah Kawalan Pergerakan (PKP).

3. Untuk makluman Ahli Yang Berhormat, Elaun Khas COVID-19 sebanyak **RM600 sebulan kepada barisan hadapan KKM** akan diteruskan sehingga ancaman pandemik ini berjaya diatasi. Dalam masa yang sama, **petugas barisan hadapan KKM juga akan menerima pemberian tambahan secara *one-off* sebanyak RM500.**

4. Sementara itu, kerajaan turut memperuntukkan **RM1 bilion bagi membiayai pembelian peralatan perubatan** seperti ventilator, peralatan di Unit Rawatan Rapi (ICU) serta keperluan makmal untuk saringan COVID-19. Pertambahan peruntukan ini adalah bertujuan agar petugas barisan hadapan dapat bekerja dengan lebih efektif dan efisien melalui penambahbaikan sistem kesihatan dari aspek pembangunan, perolehan peralatan serta perkakasan berkaitan bagi menangani situasi COVID-19.

5. Sejak bulan Februari 2020, pihak Kerajaan telah memperuntukkan lebih RM1.7 billion yang digunakan bagi memerangi penularan wabak COVID-19 di negara ini. Peruntukkan tersebut telah disalurkan kepada 14 buah Kementerian dan Kerajaan Negeri dan ini termasuklah:

- a. RM1 billion kepada Kementerian Kesihatan Malaysia (KKM);
- b. RM250 juta kepada Agensi Pengurusan Bencana Negara (NADMA); dan
- c. RM247 juta kepada Kementerian Dalam Negeri (KDN).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DR. NIK MUHAMMAD ZAWAWI BIN HAJI
SALLEH [PASIR PUTEH]**

TARIKH : 17 NOVEMBER 2020 (SELASA)

SOALAN

Minta **PERDANA MENTERI** menyatakan apakah halatuju dasar tenaga untuk Malaysia dan apakah impak dasar tersebut terhadap harga gas yang dijual di Malaysia kepada sektor tenaga dan bukan tenaga.

JAWAPAN

**YB DATO' SRI MUSTAPA BIN MOHAMED,
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Untuk makluman Ahli Yang Berhormat, Kerajaan akan melaksanakan kajian Dasar Tenaga Negara atau *National Energy Policy* (NEP) dan Pelan Halatuju Gas Asli atau *Natural Gas Roadmap* (NGR) sebagai antara strategi sektor tenaga di dalam Rancangan Malaysia Keduabelas (RMKe-12).
2. Dasar Tenaga Negara ini merupakan dasar baharu yang komprehensif dan merupakan *umbrella policy* atau dasar induk yang akan menentukan dasar dan arah tuju strategik jangka masa panjang sektor tenaga negara. Dasar ini akan dijadikan panduan untuk menangani pelbagai isu merentas sektor yang menggunakan tenaga selain menggariskan langkah tindak balas kepada trend global mengenai peralihan tenaga.
3. Sementara itu, NGR merupakan *feeder policy* kepada NEP yang akan menggariskan peranan jangka panjang bahan api gas untuk sektor elektrik dan bukan elektrik. Ini termasuk aspek pembekalan dan permintaan masa hadapan (*supply and demand*) selain strategi untuk meningkatkan persaingan melalui kawal selia Akses Pihak Ketiga atau "*Third Party Access*" (TPA) dalam pasaran gas domestik kearah memastikan harga yang kompetitif. Harga gas yang kompetitif melalui persaingan yang adil akan menarik pelaburan di sektor hulu minyak dan gas dan seterusnya memastikan jaminan dan kemampanan bekalan tenaga jangka masa panjang negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : YB TUAN CHAN MING KAI [ALOR STAR]

TARIKH : 17 NOVEMBER 2020 (SELASA)

SOALAN

TUAN CHAN MING KAI [ALOR STAR] minta **PERDANA MENTERI** menyatakan apa punca halangan untuk membenarkan pegawai perubatan kontrak supaya ditawarkan Hadiah Latihan Persekutuan (HLP) serta apa usaha untuk menambah peluang tersebut kepada pegawai perubatan kontrak yang merupakan *frontliner* sekarang.

JAWAPAN

**YB DATO' TAKIYUDDIN BIN HASSAN,
MENTERI DI JABATAN PERDANA MENTERI (PARLIMEN DAN
UNDANG-UNDANG)**

Tuan Yang di-Pertua,

Untuk makluman Ahli Yang Berhormat, sejak 22 Julai 2008 urusan penawaran Hadiah Latihan Persekutuan (HLP) kepada pegawai perubatan adalah di bawah bidang kuasa Kementerian Kesihatan Malaysia. Dasar dan tatacara semasa menetapkan bahawa pemberian HLP hanya dipanjangkan kepada pegawai perubatan berstatus tetap yang memenuhi syarat-syarat:

- i. Disahkan dalam skim perkhidmatan semasa; dan
- ii. Memperoleh markah purata Laporan Nilai Prestasi Tahunan (LNPT) sekurang-kurangnya 85 peratus bagi tempoh genap tiga (3) tahun berturut-turut.

Bilangan permohonan yang diterima bagi tempoh tiga (3) tahun mulai 2017 hingga 2019 adalah sebanyak 3,000 hingga 3,200 permohonan yang diterima berbanding hanya 1,000 tempat sahaja berdasarkan peruntukan yang disediakan.

Demi menjaga keharmonian skim perkhidmatan pegawai perubatan, sewajarnya penawaran HLP hanya diberikan kepada pegawai perubatan tetap sahaja memandangkan masih ramai lagi yang belum berpeluang ditawarkan HLP bagi menyambung pengajian di peringkat Ijazah Lanjutan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : YB DATUK SERI HAJI SALAHUDDIN BIN
AYUB [PULAI]**

TARIKH : 17 NOVEMBER 2020 (SELASA)

SOALAN

DATUK SERI HAJI SALAHUDDIN BIN AYUB [PULAI] minta **PERDANA
MENTERI** menyatakan status terkini Rang Undang-undang Suruhanjaya
Parlimen

JAWAPAN

**YB DATO' TAKIYUDDIN BIN HASSAN, MENTERI DI JABATAN
PERDANA MENTERI (PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, Draf Rang Undang-undang
Suruhanjaya Perkhidmatan Parlimen telah disediakan. Kerajaan sedang
menghalusi dan meneliti penubuhan Suruhanjaya Perkhidmatan Parlimen
Malaysia.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : TUAN OSCAR LING CHAI YEW [SIBU]

TARIKH : 17 NOVEMBER 2020 (SELASA)

SOALAN

Minta **PERDANA MENTERI** menyatakan jumlah cukai produk petroleum yang dituntut oleh Kerajaan Negeri Sarawak, nyatakan jumlah yang sudah dibayar balik kepada Kerajaan Sarawak dan anggaran jumlah yang perlu dibayar bagi tahun 2020, 2021 dan 2022.

JAWAPAN

**YB DATO' SRI MUSTAPA BIN MOHAMED,
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Sebagaimana Ahli Yang Berhormat sedia maklum, cukai jualan ke atas produk petroleum atau dikenali sebagai *State Sales Tax* (SST) berjumlah RM2.9 bilion telah dibayar oleh pihak PETRONAS kepada pihak Kerajaan Negeri Sarawak pada 15 September 2020 untuk tempoh perakaunan 1 Januari 2019 sehingga 31 Disember 2019.

2. Cukai jualan bagi tempoh perakaunan 2020, 2021 dan 2022 akan ditentukan dan dibayar berdasarkan penilaian oleh Pengawal Selia Cukai Jualan Negeri Sarawak (*Sarawak Comptroller of State Sales Tax*) mengikut ketetapan yang diperuntukkan di dalam Ordinan Cukai Jualan Negeri 1998. Sekian, terima kasih.